

讀史方輿紀要/卷一百二十七



以2024年9月16日从维基文库导出

淮水

《[禹貢](#)》言導九川。孟夫子推禹抑洪水之功，則第曰江、淮、河、漢。此四大川者，其亘千古而不易乎？雖然漢合於江者也，今日之淮又合於河者也。陵谷漸移，平成難冀，吾又安知河之不獨爲一川，而淮且南注於江乎？爲紀淮水。

淮水出河南桐柏縣桐柏山，

《[禹貢](#)》曰：「導淮自桐柏。」淮之源與古不異也。或以爲出自大復，或以爲出自胎簪。夫大復、胎簪之去桐柏也僅矣。何必求勝於古人耶？ 詳

見《[禹貢](#)》山川。

東流經信陽州北，確山縣南，又東歷羅山縣北，真陽縣南。

淮水在信陽州城北四十五里，魏人所云「義陽差近淮源」者也。 詳見信陽形勢。 淮之北岸即確山縣境。北去縣四十里。東流七十里至羅山縣境，

南去縣二十里。淮之北岸爲真陽縣境，北去縣八十里，南北相爭，淮流常爲襟要。

又東經息縣南，又東經光山縣北，

淮水在息縣南五里，東流三十里徑光山縣北，南去縣八十里。自汝、潁而問途於江漢者，光山其利涉之所矣。

又東徑光州之北，又東北流經固始縣北，

淮水在光州城北六十七里，又東北流百四十餘里而經固始縣北，南去縣七十里。 唐貞元十三年淮水溢

於濠州，蓋自縣境北溢入州界。 淮西有事，此爲襟要之地，蓋自固始而東，可以疾走壽春。淮之北岸則爲南直潁州之界。

又東北經潁州之南，又東經霍丘縣北，

淮水在潁州城南百三十里，又東流十餘里汝水自河南境流入焉， 汝水，詳見河南大川。 亦謂之淮口。淮口南北相爭時要口也。淮之南岸即霍丘縣界，南去縣三十里。

又東流經潁上縣南，又東經壽州之北，

淮水在潁上縣南三十里，又東三十五里即東、西正陽鎮也，東正陽屬壽州，西正陽屬潁上縣。 夾淮據險，爲古來之津要，今商旅往來者皆輳集焉。潁水亦自河南境流經此入於淮，潁水，詳見河南大

川。謂之潁口。蓋自北而南者，潁口其必爭之地矣。又東六十里至壽州之北，南去州城二十五里。肥水自南流入焉，肥水，詳見南直大川。

謂之肥口。亦曰淮口。 肥口者，淮南之喉吭，戰守之樞機也。立國於東南，壽州常爲重鎮，豈非以肥、潁二口濱淮環帶也哉？

又東經懷遠縣南，又東經鳳陽府北，

淮水在懷遠縣南一里，流經荊、塗兩山之間。

荊、塗兩山，見懷遠縣。 至縣城東稍折而北，

渦水亦自河南境流入焉，渦水，詳見懷遠縣。 謂之渦口，亦淮南津要也。又東至鳳陽府北，

《輿程記》：「自懷遠縣緣淮而東，三十里曰半步溜，又二十里曰長淮溜，又二十里曰十里溜，又三十里而至鳳陽府，陸行則

七十里而至矣。」 南至府城十里，濠州向爲淮南重鎮，蓋以長淮爲屏障也。

又東北經臨淮縣北，又東北經五河縣南，

淮水自鳳陽府而東，又折而北，凡二十餘里而經臨淮縣城北。稍東曰新河口，濠水自南流入焉，

濠水，詳見鳳陽府。 謂之濠口。又東北流八十里而經五河縣城，東南一里，有澮河、沱河、滎河、潼河自縣西北次第流入焉， 俱見五河

縣。 與淮爲五河，因謂之五河口也。 五河交

會之處，在縣城東二里。

又東徑泗州城南，盱眙縣北，

淮水在泗州城南一里，淮之南岸，去盱眙縣城北二里，兩城相距凡七里，自昔爲淮流矜束之處，戰守所必資也。汴水自河南境流經泗城東而合於淮，

汴水，詳河南大川。 亦謂之汴口。宋時以此爲漕運要衝，今惟涓流可辨耳。由泗城而東三十里，龜山峙焉， 山見盱眙縣。 淮流至此，乃盤折而北。又二十餘里而洪澤、阜陵、泥墩、萬家諸湖

環匯於淮之東岸，淮水漲溢，恒在於此。泗州逼淮而地下，故侵陵之患每不能免也。 《唐志》：

「貞元八年淮水溢沒泗州城。」又《宋志》：「開寶七年淮水溢入泗州城，咸平四年復溢，天聖四年又溢。景祐三年作外堤以備淮水，高三十有三尺，自是患稍弭。」歐陽修云：「泗州之患莫暴於淮。」是也。元大德十一年淮水溢入南門，深七尺餘，明正統十二年泗州水患尤劇，蓋淮之患，未有不首被於泗者。

又東北經清河縣南而合於大河，

淮水經清河縣南五里，泗水自北流入焉， 泗水

亦名清河，詳南直大川。 謂之泗口，亦曰清口，自古為南北必爭之地。今黃河奪泗之流，乃為黃、淮交會之衝。淮之南岸則運河流入焉，所謂清江浦口也。 詳見運河。 淮河既受黃流之委輸，又為運渠之灌注，勢不能安流以達海矣。說者曰：淮河受汝、潁、肥、濠、渦、汴諸大川及淮南七十二溪之水以注於海，水清流疾，恒無壅決之患。淮之患自河合淮始也。河自北而來，河之身比淮為高，故易以遏淮。淮自西而來，淮之勢比清江浦又高，

《河渠考》：「泗州淮身視清江浦高一丈有餘，自高趨下，

勢常陡激是也。」 故易以嚙運。然而河不外飽，則

淮不中潰，惟并流而北，其勢盛，力且足以刷河。淮卻流而南，其勢殺，河且乘之以潰運矣。病淮必至於病運者莫如河，利河即所以利運者，莫如淮，黃、運兩河之樞機，實自淮握之。則今日之治淮，乃治河治運之先務也。然則何以治之？曰：吾亦以淮治淮而已。夫淮之源流於《禹貢》時未有改也，若欲駕其功於神禹之上，則淮不治。昔之淮東會於泗、沂，今之淮東會於大河。會泗、沂而治，會河則不治者，泗、沂小於淮，河大於淮也。我不能使今日之大河如昔之泗、沂，乃欲使今日之淮更不如昔之淮，則淮不治。然則高厚其隄防使淮無所旁出，修明平水之製使淮不至於漲溢，此陳平江之治

淮，所以二百年無事者與？《河渠攷》： 即

《治河通考》，明劉隅、潘季馴等輯。 「明隆慶四年淮

決於高堰， 即高家堰，在淮安府西南四十里。 河

亦決於崔鎮， 見前大河。 漕臣王宗沐修塞

之。 宗沐《決河記》云：「是年淮決高堰，河躡淮後，徑趨大澗口，破寶應黃浦口入射陽湖，清口遂淤，海口幾爲平

陸。」 萬曆三年高堰復決，於是山陽、高、寶、興、鹽諸處悉爲巨浸。黃水躡淮之後，濁流西沂，浸及鳳、泗，清口填淤，海口亦復阻塞，而漕、黃交病矣。」河臣潘季馴以爲高堰淮揚之門戶，而黃、淮之關鍵也。欲導河以入海，勢必藉淮

以刷沙。淮水南決，則濁流停滯，清口亦堙，河必決溢上流，水行平地，而邳、徐、鳳、泗不免皆爲巨浸。是淮病而黃病，黃病而漕亦病，相因之勢也。於是築高堰堤，長八十里，起自武家墩，

在高堰北十餘里。經大、小澗，大澗在高堰南十三里，又南五里即小澗。大澗口爲衝決要處，築石堤以護其口，長數百丈。歷阜陵湖、湖在堰西南二十餘里。周家橋，北去高堰四十餘里。翟壩

在周家橋南二十餘里，爲山陽、盱眙接界處。或曰周家、翟壩，長二十五里，與高郵南、北金門兩閘及西堤四十里石工相對，

周橋、翟壩決，而高郵南北衝溢無時矣。以捍淮之東侵。又以淮水北岸有王簡、張福二口，淮水每從此洩入黃河，致淮水力分，而清口淤淺，且黃水泛漲亦往往由此倒灌入淮，於是并築堤，捍之堤在清口西三里，後議者又以束淮太迫，於張福堤窪處黃韶、王簡二口置減水二閘，淮溢則縱之外出，黃溢則遏其內侵。王簡口亦曰王家

口。使淮無所出，黃無所入，於是全淮畢趨清口，會於大河以入海，而河與漕俱治。蓋高堰之築，始於漢末之陳登，修治於明初之陳瑄，而復於

季馴云。隆慶四年王宗沐修築高堰，卑薄無所增加，隨即

圯壞。至是經理，始盡制焉。

萬曆二十一年淮復決於

高良澗，在淮安府西南七十里，志作九十里。 凡二十二口，旋築塞之。明年黃水大漲，清口沙墊，阻遏淮水不能東下，於是挾上源阜陵諸湖與山谿之水暴浸泗州陵，州城湮沒。是時科臣張企程言：「周

家橋北去高堰五十里，其支河接草子湖，在寶

應縣西南五十里。 若浚三十餘里，一自金家灣

在揚州府北四十里。 入芒稻河 在揚州府東三十

里。 注之江，一自子嬰溝 在寶應縣南六十

里。 入廣洋湖 在寶應縣東南五十里。 注之海，則淮水洩矣。武家墩南距高堰十五里，逼永濟

河，在淮安府西南，一名新河。 引水自窑灣閘出

口 即新河接運河之間。 直達涇河，在寶應北

四十里。 自射陽湖入海，則淮之下流有歸。」此急救祖陵之議也。二十三年淮復決高家堰、高良澗諸處，尋築塞之。明年河臣楊一魁以黃、淮衝溢，乃議分黃導淮，闢清口沙七里達淮之經流，建武家墩涇河閘以洩淮之旁溢；又建高良澗減水石閘、子

嬰溝、周家橋減水石閘，一自岔河 在新河

南。下涇河，一自草子湖寶、應湖下子嬰溝，俱通廣洋湖及射陽湖入海；猶慮淮水宣洩不及，南注各湖爲患，又開高郵西南之茆塘港 在州西南六

十里。通邵伯湖，開金家灣下芒稻河入江以疏

淮漲，一魁所舉行，大抵本於企程之說。於是淮患漸平。自是雖時有決溢，而培固高堰，增置壩閘之外，無所爲治淮長策也。《兩河議》 兩河，謂

黃、淮也。見明季《河工奏議》。曰：「高堰去寶應高丈八尺有奇，去高郵高二丈二尺有奇。寶應堤去興化、泰州田高丈許，或八九尺有奇，去高堰不啻卑三丈有奇矣。昔人築堰使淮不南下而北趨者，亦因勢而導之。不然淮一南下，因三丈餘之地勢，灌千里之平原，安得有淮南數郡縣儼然一都會耶？萬曆二十一年淮漫高堰堤上且數尺，周家橋口原自通行，又加決焉。決高良澗至七十餘丈，南奔之勢若倒海，高、寶、邵伯諸湖堤一日崩者百十餘處，於時泗城亦復灌溢，而所減之水不過尺許。則以淮南之地，自高、寶而東則下，由邵伯而南則又昂，自興、鹽以東濱海諸鹽場，比內地亦復昂也。泗州之地比高堰爲下，與高、寶諸州縣皆若釜底然，安能免淮之浸哉？雖然淮之浸河阻之也，河之阻未必不

仍自淮致之也。高堰一帶，修守不嚴，奸商鹽販之徒無日不爲盜決計。泗州之人，未究利害之源，但見高堰增築，勢必且遏淮以入泗，惟恐堰之不速潰也。淮之旁流日多，則淮之正流日弱。於是刷沙無力，而黃流益橫。清口就淤，勢不得不倒灌淮南，決堤堰而敗城郭，委運道於茫無畔岸中矣。於此時而議導淮，導淮亦治標之一策耳。善乎先哲之言曰：『禦黃如禦敵，淮日退則黃日進。』論者若以導淮爲秘計，而不察其爲弱淮之先徵也，淮之患安有窮已耶？」

又東經淮安府城北，又東徑安東縣南而入於海。

淮水自清口而東五十餘里而經淮安府北，去城五里而近。又東九十里經安東縣城南，又東北五十餘里即海口也。黃、淮並流，勢盛流疾，海潮若迎若遏，互相回旋。其地有四套、五套、六套之名，蓋

皆湍激所成也。 謂之海套。 勢益東北出，西岸近海州雲梯關，亦謂之雲梯海口。海口闊處幾十四五里，或七八里，安東而上，大約二三里，此即《[禹貢](#)》以來淮水入海之道也。自桐柏發源以達於

海，經流曲折，幾二千餘里。 《漢志》：「淮水出桐柏大復山，東至淮陵入海，過郡四，行三千二百四十里。」郡

四，謂南陽、汝南、九江、臨淮也。 潘季馴曰：「淮、黃相合，淮得黃而力專，黃得淮而流迅，兩河相

合，同趨中流，此治淮即以治河，并即以利漕之大機也。」

右淮河。

漢水

漢水自梁而荊，匯江入海。或曰漢合於江，自源而流，亦甚近矣，似難與江、河並列者也。余曰：以瀆言則曰濟，以水之大者言則曰漢，孟子之爲義也大矣，因紀漢水。

漢水出陝西寧羌州嶓冢山，

《[禹貢](#)》「嶓冢導漾」，即此山也。《[水經](#)》以爲

沔水出武都沮縣東狼谷中，沮縣，今陝西略陽

縣。東南流注漢。然則沔水特入漢之小水耳，乃言沔水之源而不詳漢所自出，舛矣。酈道元以爲沔水一名沮水，東南流會於沔，同爲漢水之源。說

者謂漢有二源，理或然矣。隴東之山皆嶓冢，狼谷

亦嶓冢之支裔耳。今略陽縣東南有分水嶺，或以爲即狼谷。

陸游曰：「嘗登嶓冢山，有泉涓涓出山間，是爲漢水之源。」孔氏曰：「泉始出山爲漾。」非即此水歟？

東流經沔縣南，又東徑褒城縣南，

漢水在沔縣南十餘里。孔氏曰：「漢上曰沔，縣以水名也。」又東南流經褒城縣南四里，而東入南鄭縣界。

又東南經漢中府城南，又東經城固縣南，

漢水在漢中府城南三里，又東徑城固縣南五里。志云：漢水自褒城而東，曲折環流，爲郡邑之襟帶。

又東經洋縣南，又東經西鄉縣北。

漢水在洋縣南一里。志云：漢在縣境中者，多灘瀨之險。自是而東，水勢漸盛，流漸闊。又東徑西鄉縣北，而洋水會諸小水流合焉，漫衍幾里許。南北朝時沿流置戍，因以爲險。

又東北流經石泉縣南，折而南流，經漢陰縣西，又南經紫陽縣城西，復折而東北流，經漢陰縣之南，

漢水在石泉縣城南，縣屹峙漢濱，稱爲津要。經縣東五六里，復折而南，流經漢陰縣西境，又南至紫陽城西五里，復折而東，經城南，又東北流出漢陰

南境，志云：漢水北去縣八十里。而入興安州界。蓋石泉以東南皆大山盤阻，漢江回繞而出也。

《輿程記》：「自洋縣行九十里地名廟上，陸行三十里，水行九十里，皆云極險，所至處名渭門。又一百八十里而至石泉縣，

又一百八十里至馬家營，又百里至紫陽縣，又二十里至中沙壩，又十里地名耳河，又六十里至小河道，又百九十里至興安州。」自洋

縣至興安州回曲幾及千里，恐迂遠不至此，今存以俟考。

又東北經興安州北，又東北經洵陽縣南，又東南經白河縣北，湖廣上津縣之南，

漢水在興安州城北四里，爲州境之襟帶，漢川有事，州其中流之會也。又東百二十里而經洵陽縣城

南，《輿程記》：「州東九十里至黎家口，又東三十里至洵

陽縣。」 旬水自北流入焉，謂之旬口。又東南流

經白河縣北，南去縣二里，《輿程記》：「洵陽縣

百四十里至樹河關，又百里至夾河關，又四十里而至白河

縣。」 北去湖廣上津縣百二十里，江口鎮在

焉，即漢濱渡口也，上津在白河縣西北百六十里，而

次於白河之後者，上津去漢遠也。

又東經竹山縣北，鄖西縣南，

漢水自上津縣而東，經竹山縣北境，南去縣百餘里，縣境諸水皆流入焉。又東流經鄖西縣南五十里

而入鄖縣境。漢江經此爲荊、梁、雍、豫四州之間，道里綿邈，山川阻深，多伏戎之患。

又東南經鄖陽府城南，又東經均州北，

漢水自鄖西縣東南流二百四十里，而經鄖陽府城南，府北通宛、洛，西走金、商，沔北之要地也。

東北流百八十里，而經均州北， 志云：漢江南去州

城四十里。 州翼蔽襄、樊恃漢水爲形勝云。

唐長慶四年，襄、均、復、鄖四州漢水溢決。開成三年江、漢漲溢，壞房、均、荊、襄等州民居及田產殆盡。會昌元年漢水壞襄、均等州民居甚衆。宋時均、襄亦多水患，蓋漢水至均州而流益盛也。

又東南經光化縣北，又東南經穀城縣東，

漢水自均州東南流一百五十里，而至光化縣城北，

《輿程記》：「自均州九十里至小江口，又六十里至光化

縣。」 又東南流五十里而至穀城縣境， 志

云：漢江西去穀城二十五里。《輿程記》：「光化東南九十里曰紫店岡，又九十里即襄陽府。」穀城在府西，爲漢水必經之

地。均水自北流入焉，謂之均口，亦襄、鄖間之要地也。

又東徑襄陽府城北，又東南經宜城縣東，

漢水在襄陽府城北，漢江北岸即古樊城也，夾江對峙，爲古今之形勝，南北之腰膂，有事戰守者必資於此。漢建安中關羽圍于禁於樊城，會沔水泛溢三丈有餘，羽乘水急擊，遂克之。自古襄陽倚樊城爲固，而樊城恃漢水爲險也。志云：漢水重濁，與大河相似，襄陽實當其衝，爲患最劇，自唐以來皆築堤繞城以防潰決，故有襄陽大堤之稱。明正統、嘉靖間，兩被漂溺，皆以大堤廢損故也。惟修築舊址，倍高且厚，襄城庶恃以無恐。自襄陽以下，漢

水益折而南，凡百二十里而經宜城縣東，漢水

西去縣四里。又南入承天府界。

又南經承天府城西，又南徑荊門州東。

漢水自宜城縣南流，凡百七十里而至承天府城西。府控臨津流，爲南北衝要，江、沔有事，此亦必爭之地也。而濁流嚙決，最爲可虞，嘉靖末曾被其

患，不可不預爲備。嘉靖四十四年府境支河盡塞，而

下流竹筒河復淤；下滯上圯，漂溺不可勝紀。竹筒河在沔陽州

北。 又南流四十里而經荊門， 州東境州西去漢

水八十餘里。 漢江至此復漸折而東矣。

又東南經潛江縣北， 又東經景陵縣南、沔陽州北，

漢水在潛江縣西北四十里， 又東南經縣北而入景陵縣境， 北去縣百里， 南接沔陽州亦百餘里。 志曰： 漢水由荊門州界折而東， 大小羣川咸匯焉， 勢盛流濁， 浸淫蕩決， 爲患無已。 而潛江地居汙下， 遂爲衆水之壑， 一望瀰漫， 無復涯際， 漢水經其間， 重湖浩淼， 經流支川不可辨也。 蓋漢水爲湖北之害， 而襄、郢二州爲甚。 潛江又承襄、郢之委流， 當漢江曲折回合之處， 瀦爲大澤， 勢不能免矣， 而景陵、沔陽， 又潛江之委流也。 今沔陽四境惟湖陂， 連亘幾數百里， 皆爲漢水所匯。 蓋漢水性曲， 往往十里九灣， 語曰「勁莫如濟， 曲莫如漢」， 郢、沔之間， 波流回盪， 自必瀦爲藪澤。 小民見填淤之利， 復從而隄防之。 爲民牧者又不講於節宣疏瀹之理， 歲月之間， 苟幸無事， 大水時至， 則委之洪濤

中耳。 童承敘 明人， 撰《沔陽州志》。 曰：

「漢水至濁， 與江湖水合， 其流必澄。 故常填淤， 而阻澤之區因成沃壤。 民漸芟剔， 墾爲阡陌。 又因其地之高下， 修隄防以障之， 大者輪廣數十里， 小者十餘里， 謂之曰垸。 其不可隄者， 悉棄爲萊蕪。 昔時垸必有長， 統丁夫主修葺。 其後法久弊滋， 修不以時。 垸愈多， 水愈迫， 客隄益高， 主隄益卑，

故水至不得寬緩，喘怒迅激，勢必衝嚙，主隄先受其害，客隄隨之汜濫洶湧，悉爲巨浸矣。」○考均州以上，漢水發源未遠，故潰決常少。漢川以下，漢水入江已近，故橫溢鮮聞。惟襄陽以迄於沔陽，上流既遠而衆流日益，入江尚遙，而地勢愈卑，漢水泛濫其中，如潰癱然，不可不察其病而圖其方矣。又天下之水，大河而外，重濁而善決者，在北

則漳與沁，又桑乾、滹沱兩河經太行而東出，自高趨下，

流濁勢急，故潰決亦常見。在南則漢。漳附衛入海，而後漳水之決少；漢附江入海，而後漢水之決少。沁本濁，而又并入於河，故河之決最多。或謂河合於淮，藉淮以刷河，而河庶幾可治。然淮終非河敵也，又安能使河之不至於決哉？

又東經漢川縣南，又東經漢陽府城東北合於大江。

漢水在漢川縣西南十里，又東南流百六十里，至漢陽府城北五里，又東南經大別山北而南入於江，謂之漢口，亦曰沔口，亦曰夏口，爲自古噤喉之地。

談東南形勝者，必以夏口爲首也。詳見湖廣重險

夏口。夏口東岸即是武昌府，自昔置重鎮於此，豈非以險要所在，控扼不可或疏也哉？蔡氏曰：「《[禹貢](#)》言江、漢朝宗於海，明乎江、漢二川勢均力敵，非有主客先後之分矣。」自蟠冢發源

以達於江，經流曲折凡三千餘里，
《漢志》云：
「沮水出沮縣東狼谷，南至沙羨南入江，過郡五，行四千里。」郡
五，謂武都、漢中、南陽、南郡、江夏也。
漢水實南紀
之雄矣。

右漢水。

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Seccom88
- Jusjih
- Wmr89502270
- 鸟甲
- 僅僅修補

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)